

Puntanan Skèrpi

Un mishonero a topa hefe di un tribu den selva di Afrika ku nunca tabatin kontakto ku hende sivilisá. El a hasié algun pregunta pa averiguá kiko e sa. “Ta robes pa mata?” E hefe a kontestá, “Si, ta robes pa mata.” “Ta malu pa hòrta?” “Si, ta malu pa hòrta.” “Bo ta hasi malu si bo gaña?” E hefe a wak e mishonero i a bisa, “Bo ta kere ku mi ta kèns?”

Dios a krea kada ser humano ku konsensia di loke ta bon i loke ta malu. Tantu e científiko den un suidat moderno, komo e salbahe sunú den selva isolá for di tur kontakto ku sivilisashon, tin konsenshi. Beibel ta bisa ku **tur** hende sa ku sierto akto ta bon i otronan ta piká, demonstrando ku lei di Dios ta “*skirbí den nan kurason*” (Romanonan 2:15).

Un indjan a deskribí e konsenshi komo “un aparato di tres punta den mi kurason. Ora mi hasi bon, e ta para ketu. Ma ora mi hasi malu, e ta kuminsá drei i e puntanan ta hasi hopi doló. Si mi sigui hasi malu, e puntanan ta bira stòmpi i no ta hasi doló mas.”

Nos ta biba den un era ku “*ta yama loke ta malu, bon, i loke ta bon, malu, loke ta skuridat, lus, i loke ta lus, skuridat, loke ta margá, dushi, i loke ta dushi, margá*” (Isaias 5:20). Antes hende hòMBER a usa palabra malu ku koutela. Awendia, hende muhé i muchanan ta papia tur klase di vulgaridat manera nada ‘n pasa. Antes korupshon tabata sosodé...na otro pais. Awendia ta fásil pa kumpra hende na nos propio isla. Antes tabata piká pa biba huntu sin kasa. Awendia e ta un opshon aseptabel. Antes, tabata un bergwensa pa un mucha muhé soltera salí na estado. Awendia e úniko bergwensa ta ku e pareha no a usa antikonseptivo.

Kiko a pasa? Kos a kambia pasobra nos era moderno ta mas iluminá, siensia a logra triunfá riba e bareranan di moralidat? Apsolutamente nò! Awendia mas i mas hende ta ignorá e doló ku e aparato di tres punta ta kousa den nan kurason ora nan a hasi malu; e puntanan ta bira stòmpi. Beibel ta deskribí e “puntanan stòmpi” komo “*konsenshi.. kimá komo sifuera ta ku un heru kayente*” (1 Timoteo 4:2).

Promé ku ta baña un beibi, e mama ta kontrolá temperatura di e awa. Pa hasi esaki, e pone un tiki awa riba e parti sensibel di su mes brasa. E no por konfia su man pa diserní si e temperatura lo ta komfortabel pa e kutis delikado di e kriatura, debí ku e man a kustumbrá ku temperaturanan muchu mas frio òf kayente.

Ta méskos ku konsenshi. **Bo por hasi piká tantu biaha ku e no ta molestiábo mas.** Antes, bo piká, immoralidat, aktonan i palabranan malu a pone bo konsenshi trose di doló. Ma awor no mas. Bo konsenshi a bira duru...kimá!

E pirata Gibbs a terrorisá Karibe te ku el a ser kapturá. Promé ku su ehekushon, el a konta ku e promé biaha ku el a roba un barku i mata, su konsenshi a keda konden’é. Ma siguiendo ku su pirateria, su konsenshi a trankilisá. Dia a yega ku e por a roba un barku, mata tur tripulante, i drumi dushi anochi.

Kisas bo piká a duel bo den pasado, ma no mas. **E no ta ménos piká pasobra e no ta tormentábo mas!** En realidat, bo konsenshi ta kimá. E echo ku bo por kometé aktonan ku Dios ta prohibí sin ku bo konsenshi ta tormentábo **no ta proba ku e akto ta bon!** E ta simplemente un testimonio silencioso ku e “puntanan” di konsenshi a bira stòmpi.

Na komienso di aña, hende ta hasi tur klase di promesa pa drecha nan bida. Ma poko dia despues di bira e página limpi, nobo, blanku den e buki di historia di nan bida, ya kaba e ta tur na vlèk mahos di nan piká. **Ma Dios por transformá bo bida!**

Bo Kreador a dunábo un konsenshi sensibel. **Abo por hasié duru òf mantené moli. Ta keda na bo.** Si bo entregá bo bida na Kristo, lesa i biba konforme ku Skritura Santu diariamente, bo por mantené e puntanan di konsenshi skèrpi.